

# BATAKURU PUULUSA DIMMURU HAA E

## BE TESALONII BEN

**1** <sup>1</sup>Immorde e an min Puulusa, wondude e Silaasi e Timotee, haa e ngal \*moftal wongal Tesalonii humondirngal e Alla Baaba men, e Iisaa Almasiihu Joomi on: <sup>2</sup>yo moyyere e buttu wonan on immorde e Alla Baaba men, e Iisaa Almasiihu Joomi on.

### Fii no Alla Naawiroyta Yimbe ben

<sup>3</sup> Meden haani, yo musibbe, duumaade e jarnugol Alla fii mon, dun-le ko ko feewi, ko fii gomdinal mon ngal no beydaade, awa kadi giggol ngol yidindirdon ngol ko e beydaade tun woni. <sup>4</sup>E hoore dun, meden mantorde on e nder mofte Alla den, sabu njajnaare mon nden e gomdinal mon ngal e nder cukkande de cukkadon den fow e satteendeeji di wakkilidon din.

<sup>5</sup> Awa, ko dundoo woni seedee jaawoore Alla feewunde nden, fii no woniron rindanbe \*laamu Alla ngu wondon tampande ngun. <sup>6</sup>Ko fii no feewi yeeso Alla ka o yottorana on bee wonbe on tampinde tampere, <sup>7</sup>e ka o yeda on buttu, onon tampinaabe ben, wondude e amen, nde Iisaa Joomi on feenoyi ka kammu, wondude e malaa'ikaabe dolnube ben <sup>8</sup>e hakkunde joyngol yiite, fii yaggingol be andaa Alla ben e be doftanooki Kibaaru Moyyo Iisaa Joomi men on. <sup>9</sup>Be lettiree halakuyee poomayankeejo, be wodditoo Joomi on e mangu bawgal makko ngal <sup>10</sup>nde o aroyi e nden nalaande, fii yo o darjine immorde e laabube makko ben, o mugina gomdinbe ben fow. Onon kadi, on gomdinii ko men seeditanii on kon. <sup>11</sup>Ko dun wadi, meden duumaade e toranagol on, fii no Alla men on wadira on rindanbe ngurndan dan o noddiri on dan, e no o laatinira e mon kala ebbooje moyye e kuude gomdinal mon ngal tippude e bawgal makko ngal, <sup>12</sup>fii no innde

Iisaa Joomi men on mawniniree e mon, e no onon kadi mawniniredon e makko, sabu sulfu Alla men on e Iisaa Almasiihu Joomi on.

### Fii Aaden Bondo on

**2** <sup>1</sup>Fii ardu Iisaa Almasiihu Joomi on, e mottondiral men ngal e makko, men torike on, yo musibbe, <sup>2</sup>wota on jabu berde mon yaawee jiibeede, maa aaniniredon wi'ugol nalaande Joomi on hewtii. Hay si goddo wi'ii on ko Alla longini men maa ko nelal maa ko batakuru ko iwri e amen, wota on hulu. <sup>3</sup>Wota hay gooto faljinir on noone woo, ko fii nden nalaande arataa ado murtaldu ndun wadude, e feenugol aaden bondo on, on muuyanaado hayrugol, <sup>4</sup>dun ko on dartotoodo immoo daroo e hoore kala ko neddanke inni ko alla e hoore kala ko rewetee, o yaha haa o joodoyoo ka juulirde Alla mawnde, o wi'itoo kanko tigi Alla.

<sup>5</sup> On anditaali mido wowlanaynoo on dun, wa fewndo ko mi wondi e mon?

<sup>6</sup>Jooni non hidon andi tigi ko tongi mo, fii yo o feenu e saa'i makko on, <sup>7</sup>ko fii fewndo doo, doole bonde suudiide den no gollude, ko woni tun fewndo doo goddo no hadi de taho haa o dira. <sup>8</sup>Ko onsay non aaden bondo on feenata. Iisaa Joomi on muliray mo wuttugol, o muncira mo jalbeendi ardu makko ndun kanko Iisaa. <sup>9</sup>On aaden bondo ardayay e kuude Ibiliisa, o wada noone kaawakeeji e maandeeji e kuude fenaandeeje, <sup>10</sup>o huutoray kala noone bone fii faayingol wonbe mulude ben, bay be jabaali yidude goonga on fii no be dandiree. <sup>11</sup>Ko dun wadi si Alla kadi accidi be e doole daynooje fii no be gomdinira fenaande nden, <sup>12</sup>fii no yidube angal peewal ngal, gomsinaali goonga on ben naawiree.

### Fii Tabital ɓe Tesalonii ɓen

<sup>13</sup>Telen-ma amen menen, yo musibbe ɓe Joomiraado on yidi, meden haani duumaade e jarnugol Alla fii mon, ko fii Allaahu on subino on gila ka fuddoode fii

kisiyee on<sup>a</sup>, e hoore \*labbinirgol on Ruuhu Allaahu on e gomdingol goonga on.

<sup>14</sup> Ko dun o noddiri on Kibaaru Moyyo mo men fejnjinani on on, fii no hebiron gebal ka mangu Iisaa Almasiihu Joomi on. <sup>15</sup> Ko dun wadi, yo musibbe, wonee tabitube, jogitodon janndeeji di men janni on din, woni non ko e kongudi, woni e bataake. <sup>16</sup> Yo Iisaa Almasiihu Joomi men on tigi, e Alla Baaba men, on Yidudo en, yedi en wakkilaare poomayankeere e tama'u moyyo immorde e sulfu makko on, <sup>17</sup> wakkilin berde mon den, tabintina on e kala kuugal e kala kongol moyyol.

### Puulusa Landii ɓen Tesalonii ɓen Torndeeji

**3** <sup>1</sup> Ka rawnoode, yo musibbe, toranee men fii no daaluyee Joomiraado on lollira e no mawniniree, wano o lolliri e mawniri ka mon non, <sup>2</sup> fii no men dandiree boyliibe ɓen e bonbe ɓen, ko fii hinaa fow mari gomdinal. <sup>3</sup> Kono Joomiraado on ko Sella-Findajo, o tabintinay on, o hisina on bondo on. <sup>4</sup> Joomiraado on no okki men hoolaare e telen-ma mon wonde hidon wadude, on wadoyay kadi ko men yamiri on kon. <sup>5</sup> Yo Joomiraado on ardo berde mon den e fee giggol iwrungol e Alla e ƙajnaare iwrunde e \*Almasiihu on.

### Hajannde fii Puyndan

<sup>6</sup> Men yamirii on e innde Iisaa Almasiihu Joomi men on, yo musibbe, yo on woddi kala musiddo wuuru do e nder puyndan, ko yaadaa e jannde nde hendordon men nden. <sup>7</sup> Ko fii hidon andi onon tigi ko honno nembirton men, ko fii men wuuri raa li puyndan hakkunde mon. <sup>8</sup> Men jaɓaali goddo fawtoo men naametee nii tun, kono ko e nder golle sattude e yangi men golliri jemma e nalorma, fii wota men wonan hay gooto e mon dongal. <sup>9</sup> Wonaa fii hari dun no haanani men men wadiri dun, kono men faalano on accirde menen tigi noone mo nembon. <sup>10</sup> E hoore dun, fewndo ko men wonnoo ka mon, men wadanno on ndee

---

<sup>a</sup>2.13 Maa: ko fii Allaahu on suborno on wa dikkuruubé fii kisiyee on.

yamiroore doo: kala on saliido gollude, wota naamu kadi!

<sup>11</sup> E hin-le men nanii wobbe e hakkunde mon no jokki puyndan, hibe jokki ko wonaa haaju mabbe edii be gollude. <sup>12</sup> Men torike ben yimbe, men jeejirii be Iisaa Almasiihu Joomi on, yo be gollu e nder buttu, be jaama ko be to'ani hoore mabbe kon. <sup>13</sup> Onon non, yo musibbe, wota berde mon maayan wadugol ko moyyi.

<sup>14</sup> On mo doftaaki ko men wi'i kon e nduu batakuru, haray maandinee fii makko. Wota on huuwondir e makko huuwondiral woo, fii yo o hersu. <sup>15</sup> Wota on jogor mo non wa gano, kono hajoree mo wa musiddo mon.

### Fii Waynitande nden

<sup>16</sup> Yo Joomiraado, Jom Buttu on, yedu on buttu kanko tigi saa'i kala e noone kala. Yo Joomiraado on wondu e mon on fow.

<sup>17</sup> Min Puulusa, mi salminirii on jungo an ngon tigi. Ko maande an nden woni e nder bataake an den fow, e hino bindi an din. <sup>18</sup> Yo moyfere Iisaa Almasiihu Joomi men on wonu e mon on fow.

---

### DEUXIÈME ÉPÎTRE DE PAUL AUX THESSALONICIENS

en Langue Pular (Fouta-Jalon)

*République de Guinée*

© 2013 Traducteurs Pionniers de la Bible

en collaboration avec

Mission Protestante Réformée